

LA VIJÀ 'D NATAL

PEUI 'T SES RIVAJE TI

...Peui 'T ses rivaje Ti; ma fin-a antlora
a l'òm a l'avio dije che al nemis
bzògna sgnaché la testa
e felo a frise
magare an ciamand
l'agiut ëd Dio
L'era scrit ant la Bibbia!

...Peui 'T ses rivaje Ti; ma fin-a antlora
ël vendichésse
l'era còsa normal : sì, «euj pèr euj
e dent pèr dent».
L'era scrit ant la Bibbia!

...Peui 'T ses rivaje Ti; it ses nà 'nt na stala,
iT l'has fàit – (fin-a a trant'ani) – ël minusié,
vivend – di dòp di – tra Toa gent
(la pòvra gent!)
come chiunque 'd noi
nen come 'n Dio.

...Peui 'T ses rivaje Ti; e Tò message
gnun òm l'avria pa gnanca imaginalo... ;
àutr che predichelo
pèr le contrà dël mond
e peui butelo an pràtica
fin-a a la Mòrt!

...Peui 'T ses rivaje Ti; e da la Cros
iT l'has dit : «PARE, PÈRDON-A!»
ai doi ladron
e a tut ël mond; gnun òm
podia parlé parèj,
mach Ti, Nosgnor
ch'iT l'has pagà pèr tuti... ëd Toa sacòcia.
Pèrchè Ti 'T ses l'AMOR
Ti 'T ses la PAS, ël BIN;
iT ses Dio

e l'òm l'é restà òm:
povròm...

Òh, se almen staneuit
– neuit ëd Natal –
fusso bon a scoteTe!

Mario Paris